

太醫局諸科程文下

當歸草堂醫學叢書四



太醫局諸科程文卷五

大義第一道

問清陽發腠理濁陰走五臟清陽實四肢濁陰歸六腑

對外發腠理者輕清之陽充滿而實于四肢內走五臟者重濁之陰傳化而歸於六腑蓋人身與天地同爲一理臟腑稟陰陽合爲一致故天爲陽而外主腠理四肢而清陽所宗地爲陰而內主五臟六腑而濁陰所入發腠理而實四肢者莫非陽氣之外達走五臟而歸六腑者必假陰氣之內傳以其凡屬乎表而

謂之陽故陽行于表凡屬乎裡而謂之陰故陰歸於裡然則陽性清而陰性濁陽務外而陰務內故二氣各從其類矣經曰清陽發腠理濁陰走五臟清陽寔四肢濁陰歸六腑厥意如斯嘗謂清陽爲天天何陽之所積濁陰歸地地何陰之所凝以天爲陽而論其陽之所積以地爲陰而論其陰之所凝孰不思人身與兩儀流通形體與二氣參應陽屬乎表而陰屬乎裡外爲陽而有輕清之性內爲陰而有重濁之體豈非法象之自然歟今夫陽法天氣也而主外陰法地氣也而主內蓋腠理四肢設乎外清陽同氣以相求

五臟六腑處乎中濁陰同聲而相應陽固從外能發
腠理而寔於四肢陰固處內能走五臟而歸於六腑
發爲散發之功實乃充寔之道走者入行於其間歸
爲經從於其裏何哉腠理爲滲泄之門因清陽之散
發故司於開闔五臟爲包藏之所因濁陰之入走故
司於鎮守四肢則本於諸陽非陽氣充入無以見履
攝之用六腑則爲於倉廩非陰陽歸從何以明傳化
之常合而言之陽氣衛固於表而旁達於四肢總而
論之陰氣滋充於臟而流傳於倉廩二氣無偏則陰
平陽秘而虛邪莫入兩者俱治則外充內養而諸疾

不生苟或陽氣一虧故外不足以固膚腠旁不足以
運四肢陰氣一弱故內不足以養神宮中不足以充
六腑是知人之有生不離於陰陽氣之爲用各從於
內外氣之所歸故平則爲和而偏則爲疾矣何以明
之王氏注曰腠理爲滲泄之門故清陽可以散發五
臟爲包藏之所故濁陰可以走入又曰四肢外動故
清陽寔之六腑內化故濁陰歸之本經亦曰陽者天
氣也主外陰者地氣也主內又曰清陽爲天濁陰爲
地以是而參之天地之大不越於陰陽人身之微豈
外陰陽者哉謹對



第二道

問其寒盛者則腫結痛深

對寒盛者久故爲緩疽之病腫結潰遲斯作深痛之
愆蓋經絡感受於寒邪血氣凝澀於形體因陰寒之
獨勝致榮衛之弗通且陰行至緩也爲疽有徐緩之
名腫毒漸深也作痛有深沈之候初則紫黯於皮膚
久則青黑於肌肉大者如拳小者如李留連歲月而
血肉始潰淹延日久而疾勢方危非一朝一夕之腐
壞成膿故其疽乃名緩矣巢氏曰其寒盛者則腫結
痛深其意若此嘗謂榮者血也故絡主血而濡養周

身衛者氣也故經行氣而周流四體得熱則淖溢而
爲病受寒則凝滯而爲病今也寒客經絡之間邪搏
血氣之分絡血故因是而稽留經氣故於斯而凝滯
因榮衛之既壅致緩疽之乃成儻寒氣偏盛也故寒
主收而腫必結陰邪獨隆也故陰主裡而痛必深腫
因寒氣之使然痛亦寒氣之所致其腫周回則上無
頭下無尾其疽無定則小如李而大如拳是皆寒多
則不能化熱熱少則未便成膿積日不潰而色變紫
黯爛如牛領之形經歲勿已而色變微青疽有膿成
之兆其腫則悠久而方潰應其陰之行緩其候則漸

積而必危法其陰之主殺甚者一歲始傾輕者數年
勿愈此古人所以名緩疽者以其寒多陰盛腫結痛
深血肉潰遲之故也上文所謂緩疽者由寒氣客于
經絡致榮衛凝澀氣血壅結所成繼之曰其寒盛者
則腫結痛深下文曰周回無頭尾大者如拳小者如
李外與皮肉相親著熱氣少其腫與肉相似不甚赤
積日不潰久乃變紫黯色皮肉俱爛如牛領形吁善
養生者經絡內調邪氣外卻又何癰疽之患乎謹對

又大義第一道

問地之濕氣感則害皮肉筋脉

對地濕感受致血氣榮衛之不行邪正稽留使皮肉筋脉之有害益地本積陰之所成濕乃致陰之所化處汚下則地氣薰騰而必甚居卑濕則陰邪濡溽而弗隆倘或保養無節因虛而感於是氣攝治乖宜乘隙而受於斯邪壅遏榮衛故皮肉失溫充而受其害稽留氣血故筋脉違灌漑而致其傷是皆濕邪流著於形體之外血氣勿榮於一身之故也經曰地之濕氣感則害皮肉筋脉其意如此嘗謂人之生也陶六氣之和而過則成疹體之立也稟五行之秀而虛則致疾分風寒暑濕之殊害形體臟腑之異今也兩儀之間

在地則生於濕邪五形之內在濕則本於土化或薰
騰於川澤之間或鬱發於卑污之處以致時雨沾濡
氣候鬱溽形在氣中本無自以傷侵入或內虛遂因
隙而感受氣衛於形感濕邪則氣必留滯血營於體
受薰氣而血必凝結俾皮肉或外於灌漑使筋脉或
乖於滋充其邪也雖搏於榮衛而寔害於皮膚百脉
之間其濕也雖凝於血氣而本傷於肌肉諸筋之分
疾之所見或痺而或痿病之所生或攣而或縱大率
痺之有五也不逃於脾肺肝心之合痿之有五也豈
越乎肌肉筋脉之分因地濕而爲邪本體虛而受病

則善衛生之士謹於保養故涉履而無虞明于調攝
雖濕邪而莫害也啟元子曰濕氣勝于榮衛之氣不
行故害于皮肉筋脉內中生濕又聖濟經曰寒濕
之類陰化氣也巢氏云濕者水濕之薰氣也卽此觀
之邪之所感而有異病之所作亦不同矣謹對

第二道

問血寔宜決之氣虛宜掣引之

對血之盛寔決破以平其有餘氣之虧虛掣引則復
其不足且經絡壅滯使榮血之不宜臟腑乖和致衛
氣之不利血之寔也不能流通壅遏于經絡之間氣

之虛也不能循環失充于形表之分決之則消其有
餘血脉宣通故寔者自散掣引則扶其不足真氣條
暢故虛者漸復于以知金鍼砭石用之有開決之功
熊經鳥伸行之爲導引之法矣經曰血寔宜決之氣
虛宜掣引之其意若此嘗謂井非穿而泉不通水非
流而源不達泉不自通其通者必藉于穿鑿之力源
不自達其達者本得于疎通之道矧夫血之寔者豈
不宜于破決氣之虛者何不行於掣引今榮者血也
以行乎脉中衛者氣也而行乎脉外血主濡之諸經
藉此以滋育氣主煦之百骸假是而溫充或寒熱之

邪而結于血故有壅塞之愆或勞傷太過而損其氣
迺見虧虛之證血寔則不能宣通欲其通者以決破
而寔自平氣虛則不能條暢欲其和者以掣引而虛
自復或開之以金鍼或射之以砭石此所謂之決破
也或象之以熊經或倣之以鳥伸此所謂之掣引也
大抵決破之法取剛利刺插以散其榮之聚掣引之
機取屈伸呼吸而調其衛之失又況癰腫之類無非
血寔之使然故必藉之以開決之法虛勞之屬無非
氣虛之所致故必資之以導引之術如是隨其宜而
用之使血氣無偏而底于安平之道矣考之于經則

曰夫癰氣之息者宜以鍼開除去之夫氣盛血聚者
宜石而瀉之以難經曰聚則腫熱砭射之巢氏虛勞
候所論導引外轉兩足十徧引去心腹諸勞王氏註
曰決謂決破其血掣讀爲導導引則氣血條暢由是
證之爲醫之士固當抑其有餘扶其不足又烏有寔
寔虛虛之過哉謹對

第三道

問熱之所過則爲膿也

對熱之所積既有以至于過毒之所潰斯有以作其
膿蓋陽邪太勝熱氣內隆薰鬱于榮衛之間既結塞

而不解，炊發于形體之外，故癰腫之由生，經絡因是而不宣，愈增熱，癰肌肉自滋，而乃壞，積漸爲膿，然則癰瘍潰壞而作膿者，未有不由乎邪熱之所過也。經曰：熱之所過，則爲膿也。厥意在斯。嘗聞夫一身之內，賴榮血以滋，充百骸之間，藉衛氣而灌養其和也，則周流而有常，受邪也，則壅滯而爲病。今也外熱侵傷，則血壅而失其運布，陽邪乘客，則氣滯而乖于流通，故經絡閉塞于中，使壅腫炊發于外，因血氣之不通，故其熱轉盛，積陽邪之不散，故其熱益隆。始則炊赤于皮膚，次則潰壞于肌肉，何哉？過熱則邪氣薰爍邪。

熾則肌肉腐爛所以血腐而膿已化肉爛而膿已成
淺者應皮色而微黃深者或肉色而不變此皆熱邪
之所過留結潰壞而爲膿也何以證之經曰榮衛相
干遇熱加之血氣壅積結聚成癰熱積不散血肉腐
壞化而爲膿正理論亦曰熱之所過則爲癰腫巢氏
于癰候言之若熱甚者則爲膿斯可見矣謹對

假令論方義一道

問假令太平聖惠方治濕癰痒不可忍方用鯽魚一
枚入硫黃末一分從魚口中送入腹內用磚一口安
魚在上以炭火周迴燂令魚焦黃碾爲細末入膩粉

三錢麻油調塗之據本草鯽魚主諸瘡硫黃膩粉皆殺蟲之要藥也然後條又載治浸淫瘡多汁者亦用鯽魚一枚去骨取肉豉二百粒相和搗爛傳于瘡上及觀本草豉主傷寒頭痛寒熱瘴氣惡毒等證迺不治瘡而古人特用此物相和搗之以敷瘡上此何意也願併陳之

對瘡癰發于外固當施塗敷之方藥物有其殊尤當辦制用之理且濕疥之癰本皮膚受風濕之邪浸淫之瘡乃心經有風熱之氣窮其源也既所得之有異施于治也故立法而亦殊或用鯽魚而兼乎硫黃之